



*Kamis, 3 Agustus 2023*  
**Ogen : Amos 3:3-8**



**IpetangkasNa Lebe Sura-suraNa**



Amin pe Tuhan e erkuasa, kai pe banci ibahanNa, la pernah ilakokenNa sada-sada dahin adi la arihkenNa entah ipebetehkenNa man persuruhanNa. Kai pe ateNa si ibahanNa leben ipebetehkenNa. Umpamana, tupung lit sura-suraNa engkernepken kuta Sodom ras Gomora, turikenNa lebe man Abraham kai sura-suraNa. Sanga ibabana pe ateNa bangsa Israel i Mesir nari, turikenna lebe man Musa. Sanga iukumna entah iselamatkenna atena kuta Niniwe pe iturikenna lebe man Juna ras sidebanna.

Lit sura-sura Tuhan mereken ukumen man kalak Israel erkiteken dosa-dosa si ibahanna. La akap Tuhan sikap natap-natap bangsa si ipilihNa ngelakoken kejahatan. Dosa bangsa e la ralang-alang, si mesera baban geluhna idehken, si la lit sima-simana la iperdiateken. Pemimpin ndarami si bayak jadi temanna gelah aman geluhna. Si bayak mereken sogok man pemimpin gelah banci ia erkuasa. Bahanna persembahen ku rumah pertoton tapi kebujuren la teridah i bas geluh si teptep wari. Mesui pusuh Dibata natap perbahanen bangsaNa. iukumNa ateNa pe gelah jera. Sura-surana ngukum bangsa Israel e ipetangkasNa leben arah nabi-nabiNa.

Ipetangkas, gelah bangsa e la sengget di kune ipeseh Tuhan sura-suraNa. Ipetaangkas, entah lit kari kalak si robah ope lenga iukum. Ipetangkas, gelah banci ersikap ngatur perdalam ras perbekalen entah lit perluna. Melala gunana adi ipetangkas leben. Ipetangkas Tuhan sura-suraNa ngatakensa, ras IA banci arih-arih. Ia la otoriter, banci denga berubah keputusanNa, di kune lit si jera ras mulihken man baNa. Si perlu kai si ipetangkas Tuhan e beritaken ku sekelewet dengen jera.

